



Josu
Telleria
Uriarte



ETORKIZUNAK ITOTZEN NAU



Doinua:

Agur sagar beltzeran
Hamarreko txikia

Hamasei urte ditut
amarentzat **ume**
garauak aurpegian
hainbat **gorriune**.
Aldartea aldatzen zait
sarri, unez **une**
superheroia ala
apal eta **xume**
ta ikasketak dira
bizitzaren **gune**.

Nire zain omen dago
hor **Batxillergoa**
Zientziak, Gizartea
ta **Artistikoa**
edota hartuko dut
halako **Zikloa**
notekin kalkulatur
batez **bestekoa**
erabaki behar ta
denbora **badoa**.

Baina zer aukeratu
gakoa hor **dago**
ezin dut hau luzatu
denbora **gehiago**.
Gurasoek Uni-a
lukete **nahiago**
eta nik zer ez dakit
galduta **zeharo**
kaixo heldutasuna
agur **umezaro**.

Unibertsitateak
makina bat **arau**
Lanbide Heziketa
zertarako da **hau?**
Presiopean nago
familia, **enparau...**
lorik ezin eginda
daramat hainbat **gau**
nire etorkizunak
ito egiten **nau**.

Barrutik sentitzen naiz
nekatuta, **zisko!**
Ardurak hartzen dakit
baina ez naiz **harrizko**
bide bat hautatzeko
zenbat **amesgaizto**
dudan adinarentzat
asko, **gehiegizko**.
Ba orain erratzen banaiz...
aldatu ta **listo!**



Guk ba al dakigu zer-nolako ikasketak edo lanbidea eduki nahi dugun?